



*Selasa, 24 September 2024*  
**Ogen: Sakaria 11:4-14**



**"Permakan Si Mehuli"**



**O**rang tua si mehuli, getukna nge anakna adi erbahan kesalahen. Getukna e tandana atena keleng, gelah ulanai iulih perbahanen si salah. Bageme Dibata Israel ngukum bangsaNa adi ngelakoken kejahatan. Labo bangsa sideban ngenca iukum ras ikerneppen Tuhan erkiteken ngelawan Tuhan, tapi bangsa Israel pe. Teridah maka permakan-permakan/pemimpin-pemimpin Israel pe la ermediate man rakyatna. Bulu biri-biri ipotongna, ibunuhna biri-biri e ras dagingna idayakenna. Permakan biri-biri e la erkuah ate nandangi biri-birina. Enda gambaren pemimpin si la ermediate nandangi rakyatna, la ipekena-kenana, ras la ijagaina rakyatna. Permakan permakan si bage pe iukum Tuhan nge. Tapi sope lenga iukum, iutus Tuhan sekali nari nabi Sakaria lako erbelas man biri-biri e kerina. Nabi Sakaria pelulah-kulah jadi permakan. Iabana dua ciken, eme ciken 'ngena ate' ras ciken 'persadan.' E sada simbol gelah min bangsa Israel banci denga ersada, ras banci denga sikeleng-kelengen saph sapi ia. Nabi Sakaria selaku permakan isuruh lako mpersadaken kerina bangsa Israel.

Tapi kai si jadi? Kenca permakan-permakan si la erngena ate man perpulungen e iukum Tuhan, biri-biri e pe lanai ka ersada. Kerina ia nggeluh erbana-bana. Enggo ndekahsa lanai erdalam ras Dibata, lanai ietehna mehuli. E maka nina Sakaria, 'lanai aku permakanndu' gundari atendu, si mate atena matelah, si bene atena benelah, sibunuhen pe atena, bunuhlah. Persadan Juda ras Israel pe dungna peltep. Bagem mberatna akap Sakaria mpersadaken bangsa e mulihi. Saja, Sakaria la nggit ngadi i bas si mesera e. Tetap ia patuh ndalanken persuruhen Tuhan. La ia nggit nogan sabap Tuhan si nuruhsa. Permakan si mehuli, eme si nggit erkorban lako engkelengi biri-birina. La erperkiraan nandangi kai si enggo ibahanna, sabap igejapkenna Dibata nampati ia.